

Reglur um sjúkrakennslu fyrir grunnskóla í Hafnarfirði

Markmiðið þessara reglna er að vera til leiðbeiningar um við hvað skuli miðað þegar tekin er ákvörðun um sjúkrakennslu í grunnskólum Hafnarfjarðar. Byggt er á ákvæðum reglugerðar um nemendur með sérþarfir (nr. 585/2010), en þar segir um sjúkrakennslu (23. grein):

Nemandi, sem að mati læknis getur ekki sótt skóla vegna slyss eða langvarandi veikinda, á rétt á sjúkrakennslu annaðhvort á heimili sínu eða á sjúkrastofnun. Kennslan getur að hluta til farið fram sem fjarkennsla eða dreifnám undir leiðsögn kennara og eftirliti foreldra eða starfsmanna sjúkrastofnana að höfðu samráði við grunnskóla viðkomandi nemanda. Ákvæði þetta tekur ekki til tilfallandi veikinda nemenda sem standa skemur en viku.

Nemandi á rétt á sjúkrakennslu um leið og hann að mati læknis getur lagt stund á nám og skal lengd daglegrar eða vikulegrar sjúkrakennslu miðast við ástand hans og þrek. Markmið sjúkrakennslu er að nemandi missi sem minnst af kennslu og verði ekki af tækifærum til náms vegna slyss eða langvarandi veikinda.

Skólastjóri ákveður í samráði við lækni og foreldra, umfang og nánara fyrirkomulag kennslunnar. Hann ber ábyrgð á því að viðeigandi sjúkrakennsla sé veitt. Hann ber ábyrgð á gerð einstaklingsnámskrár til lengri eða skemmri tíma þar sem tekið er mið af aðstæðum, veikindum og þörfum nemanda.

Nýta skal upplýsinga- og samskiptatækni eins og kostur er þegar sjúkrakennsla er skipulögð. Þá skal nemandi eiga þess kost að tengjast skólanum sínum og umsjónarhópi sem best eftir því sem aðstæður og ástand hans leyfir.

Um kostnað af sjúkrakennslu nemenda fer samkvæmt lögum um tekjustofna sveitarfélaga nr. 4/1995 og samnings sem gerður er á grundvelli þeirra.


Sjúkrakennsla getur einnig komið til ef mætingar nemanda í skólann eru slitróttar vegna langvarandi veikinda. Það er alltaf á ábyrgð nemenda, og aðstandenda þeirra, að halda áfram námsvinnu meðan á stuttum veikindaleyfum stendur.

Reglur um framkvæmd sjúkrakennslu í grunnskólum Hafnarfjarðar

Skólastjóri tekur ákvörðun um og ber ábyrgð á framkvæmd sjúkrakennslu í samræmi við ákvæði reglugerðar nr. 585/2010, 23. gr. og eftirfarandi reglur um framkvæmd sjúkrakennslu í grunnskólum Hafnarfjarðar:

1. Ákvörðun skóla um sjúkrakennslu skal byggð á mati læknis og foreldra. Skólar skulu óska eftir læknisvottorði eða öðrum nauðsynlegum upplýsingum frá lækni.
2. Nemendur sem sinna ekki námi sem skyldi, svo sem vegna hegðunarerfiðleika eða slakra mætinga, geta fengið sambærilega kennslu og sjúkrakennsla er meðan mál þeirra eru í vinnslu. Ákvörðun skal tekin í samráði við Skólaskrifstofu Hafnarfjarðar og foreldra og hún jafnframt eftir atvikum tilkynnt til barnaverndar.
3. Fjarvera frá skóla er að lágmarki fimm skóladagar áður en sjúkrakennsla hefst. Ákvörðun um sjúkrakennslu byggir á mati á því hversu langan tíma líklegt er að nemandinn geti ekki mætt í skóla vegna veikinda, slyss eða annarra sérstakra aðstæðna.
4. Ákvörðun um sjúkrakennslu skal ávallt tilkynnt nemendaverndarráði skóla og sérkennslufulltrúa grunnskóla á Skólaskrifstofu Hafnarfjarðar.
5. Markmið sjúkrakennslu er að nemandi geti fylgt námskrá eins og kostur er. Vinna þarf einstaklingsnámskrá þar sem kemur fram hvernig námsgreinum er forgangsraðað. Kynna þarf námskrána fyrir foreldrum.
6. Sjúkrakennsla fer að öðru jöfnu fram á heimili nemanda, í fjarnámi og/eða dreifnámi. Gott samstarf skóla og foreldra er lykilatriði. Foreldrar bera ábyrgð á að aðstæður séu heppilegar og/eða að koma nemenda í sjúkrakennsluúrræði utan heimilis. Skólar veiti foreldrum allar upplýsingar um námsmarkmið, námsefni, vinnulag og annað það sem stuðlar að árangri kennslunnar.
7. Sjúkrakennsla er greidd af viðkomandi skóla. Í lok fjárhagsárs er skoðað hvort að einstaka skólar hafa þörf fyrir sérstakar millifærslu frá Skólaskrifstofu Hafnarfjarðar vegna mikils kostnaðar við hana.

Hafnarfirði, 30. desember 2015



Magnús Baldursson, sviðsstjóri